

宋

史

翼

宋史翼卷二十六

陸欽聖突二張燕公巡廣東南韶興樓過韶州城巡撫城隍樓望韶州城隍廟加四級臣陸心源輯

列傳第二十六

文苑一

張景 李旼 張先

齊唐 邵餗 強至

韋驥 章友直 晁仲衍

楊景略 鄧忠臣 華鎮

謝逸弟邁 何去非 黃裳

李彭 馮正符 王令

袁百之

馬存

林慮

商倚

曾籽

黃策

王鞏

張景字晦之江陵公安人羈鼎能言嗜學尤力未冠涉通藝文頗班班言當世務貧不治產往從崇儀使解人柳開開以文自名而薦寵士類一見歡甚悉出家書畀之由是屬辭益有法度開每曰今日在朝廷挈囊薦笏誰踰晦之者卽厚遣使如京師時富春孫僅沛國朱巖成紀李庶幾號爲豪英晦之敝衣與游名稱籍籍美不容口計偕名在第四調主大名館陶

簿年少氣銳未能以智自將坐公累爲吏痛詆貶全州會赦還景德中廢不用則大覃思古今爲洪範王霸二書常病浮圖氏怪迂誕荒塔廟日熾雖服儒衣冠者皆共寵神之懋實六經反爲外典故因事見文爲紀傳數十篇而辨折之雖與世外馳而自信不貽云陳堯咨以西臺舍人爲本府爲言于上復選楚州實應主簿改大理評事知泗州昭信縣剪除房祀且百所輸入材瓦以完吏舍邑人宜之移掌眞州推茶務旣又請通理州事可制已報會邁疾終官下年四十九實天禧二年平生文章門人萬稱集爲二十五

通

朱景文集

李岐字渭卿自號谷子少師任奉古以著述爲志不樂仕進士大夫多稱之爲張乖崖所器隱居永康軍白沙山從之學者甚眾任中正薦乞賜處士之號詔爲校書郎凌策又薦之召授恆靈主簿國子監說書改大理丞知泉州惠安縣久之以先所著書未成乞國子監說書以修其業著孔子弟子傳讚六十卷上之得知榮州力言榮州鹽害得蠲歲額三十萬斤還雜役三百 十五家撰有道德疏二十卷乖崖語錄二卷谷子三十卷歌詩雜文七十卷年九十卒

灑水燕談

錄參四  
川通志

張先字子野烏程人天聖八年進士詩格清麗尤長

於樂府

談志

客有謂先曰人皆謂公張三中卽心中事

眼中淚意中人也先曰何不目爲張三影客不曉先

曰雲破月來花弄影嬌柔嬾起簾櫳捲花影柳徑無

人墜絮飛無影此余平生所得意也

古今詩話

李公擇守

吳興招先及楊元素陳令舉與蘇子瞻劉孝叔集於

郡圃號六客

談志

先作一叢花詞云沈思細恨不如桃

杏猶解嫁東風一時盛傳歐陽永叔尤愛之恨未識

其人先至都謁永叔閫者以通永叔倒屣迎之曰此

乃桃杏嫁東風郎中子瞻守杭先尙在嘗預宴席有

南鄉子詞

過庭錄

卒章云也應旁有老人星蓋以自謂

是時年八十餘矣子瞻數與倡酬聞其買妾爲之賦

詩皆用張姓事

書錄解題○東坡詩云詩人老去鶯鶯在公子歸來燕燕忙詩人謂張籍

公子謂張祐見侯鯖錄

晚歲優游鄉里常泛扁舟垂釣爲樂至

今號張公釣魚灣仕至都官郎

案張先曾知虢州渝州鹿邑見梅宛陵詩

集卒年八十九葬卞山多寶寺之右有文集一百卷

唯樂府傳於世

談志

子文剛字常勝好學能文再舉進

士不第

王臨川集張常勝墓誌○後山叢談云子野詞雲破月來花弄影簾幕捲花影隨風絮無

無影世稱誦之號張三影○陳振孫曰本朝有兩張先皆字子野其一博州人天聖三年進士歐陽公作

墓誌其一天聖八年進士則湖州人也二人名姓字皆同而又適同時不可不知

齊唐字祖之山陰人唐開元中浙西觀察使澥之後少貧苦學應得書皆自寫誦過一二則不忘學識之博人罕過之郡從事魏庭堅聞士也謂唐曰今之士多不讀書唐曰幸公任意以凡上書令唐一誦之如何庭堅以一秩開示乃文選頭陟寺記而唐誦不遺一字魏大驚服登天聖八年進士第嘗進龍韜勝略賦士大夫覽者皆震聳兩應制科祕閣皆首選兩對策皆在第一當塗忌其切直復排去遷著作佐郎知杭州富陽縣改祕書丞太常博士爲南雄州簽判會



交趾進麒麟唐據史傳非之斥蠻人給中國眾服其  
博物以職方員外郎致仕初鑑湖東北有山巋然與  
會稽山禹廟相望最爲山水奇偉之處唐命其山曰  
少微而卜築焉熙寧七年卒年八十八有學苑精英

三十卷少微集三十卷

會稽續志

邵餗丹陽人佚其字再舉不第養高邱園范仲淹守  
潤嘗薦之不報後數年王琪爲守逆仲淹意再薦之  
賜號冲素處士家有溪齋仲淹自潤移越道過之得  
唐人許鼎所撰祖先生墓誌於席間頗言賀監之異  
至越刻之祠堂後謫守睦州作嚴子陵祠堂記致書

於鍊求篆有云謹奉短書於先生邵公足下今春與  
張侍御過丹陽約詣先生維舟水邊聞先生歸山所  
謂其室則邇其人甚遠惘然愧薄宦之不高暨抵桐  
廬郡有嚴陵釣臺思其人詠其風能使貧夫廉懦夫  
立有大功於名教築堂而祠之又爲之記念非託之  
以奇則不足傳後今先生篆高出四海或能枉神筆  
於片石則嚴子之風復千百年未泯其尊尙之如此

以壽終

京口耆  
舊傳

強至字幾聖杭州吳山里人少有志節力學問吳俗  
喜嬉遊請謁至一切謝絕讀書屬文忘晝夜寒暑鄉

試爲舉首其賦傳四方慶歷六年登進士第遂悉破  
舊轍學古文尤積思於詩居官聽獄訟不視勢高下  
輕重窮究辨析平反甚眾居喪毀瘠過制其治終事  
一出已力不資於人最受知於韓琦琦罷政事鎮京  
兆徙鎮相魏常引至自助琦爲詩合賓客屬和至獨  
思致逸發不可追躡琦上奏及他書記皆至屬稿琦  
乞不徵青苗神宗閱其奏曰此必強至之文也至有  
守一日琦行一事不關由簽聽至翌日自言不稱職  
力辭去琦謂小事故不相關至曰小事尙爾何況大  
事遜謝數日乃肯留琦數薦充館閣未及用而卒官

至祠部員外郎累贈金紫光祿大夫有文集二十卷  
曾鞏爲之序謂其文簡古不少貶以徇俗鞏弟肇其  
壻也嘗祭以文謂以文起家以行枕身崛起進士厥  
聲四馳歷試吏職民懷去思世以爲寶錄子浚明淵  
明陟明皆登進士第淵明字隱季仕最顯贈資政殿

學士

咸淳臨安志

韋驥字子駿錢塘人生而警敏年十有七以文謁王  
安石見其借箸賦大奇之曰吾行江南入吳越見文  
士唯子與董顧行耳由是籍甚每一賦成學者傳誦  
皇祐五年登進士第累遷至屯田員外郎官制行改

朝奉郎主少府監簿元豐中遣使高麗選書狀官宰  
執以驥名聞召試牋啟驥辭不就元祐初詔近臣舉  
可任諸路使者韓維李常楊汲等皆薦驥擢利路運  
判移福建路年饑咸議請賑貸驥曰閩去京師往返  
數千里今民朝不及夕若上書待報是冠冕從容以  
救焚溺也乃檄州縣發廩而請違法之罪於朝全活  
甚眾聞盜阻險爲數州患官軍屢到吏畏怯爭言盜  
勢猛熾請招納驥曰閩盜狃於姑息變者彭孫廖恩  
皆緣此列官於朝故姦民以怙山谷市凶慝爲得計  
若遵前軌是爲民稔患因處畫斬捕方略成就法部

內肅然召爲主客郎中久之出爲夔路憲知明州乞  
閒提舉洞霄宮子壽隆以崇寧四年守衢迎驤就養  
卒焉年七十三驤秀眉冰骨樂易靜退孝友廉平文  
章藻麗一時推先後復以政事彰聞率德勵行有宿  
儒循吏之風將沒猶料理平生文稿示子孫曰吾志  
在此有文集二十卷賦二十卷壽隆至建炎初爲給  
事中次壽朋壽松壽卿壽成壽佐

咸信臨安志引陳師錫撰墓誌繫年

錄要

章友直字伯益福建浦城人少卓越自放讀書通大  
旨不屑爲舉子業族人得象爲相欲以郊恩奏補謝

去徧遊江淮嶺海間精音樂而書畫尤知名皇祐中  
用薦召試以疾辭已而詔太學篆石經廷臣復言友  
直篆法與李陽冰相上下再召赴闕友直卽日泝淮  
及泗舍舟而徒至京師篆畢除將作監主簿固辭朝  
廷知其不願仕賜銀百兩絹百匹初友直來京師有  
從之學書者友直曰篆法不可驟爲平居必先能約  
束用筆輕重及熟於畫方運圓方可其人未甚解友  
直乃對之作方圓二圖皆一筆所成其麤細位置疎  
密分毫不差且語之曰子姑歸習之能進乎此則篆  
有餘用不必見吾可也其人大駭愕不敢復請友直

工作古文非止以字畫名世而世顧多重其字每得

一幅爭珍藏之嘉祐七年卒年五十有七

王臨川集  
參閱書

晁仲衍字子長澶之清豐人今家開封之昭德坊資  
識敏悟方總角時已自如成人蚤夜抱書冊諷誦父  
母愛憐之又閔其素弱意不欲其苦之也亦陽從遊  
息夜潛起取燭或徹旦不寐益務記覽工辭章召試  
西掖賜進士第慶厯初通籍於朝適天子宴皇屬太  
清樓觀燈翠芳亭撫州進金山等皆一時盛事仲衍  
作爲歌頌以獻凡三錫詔美之侍祠南郊復奏頌極  
于褒讚上顧謂輔臣呂文靖等稱歎殊甚繼進文三



十軸後召試禁林充秘閣校理抗疏得懷守乘前政之傲專厲風節誅鋤豪強眾不敢犯法郡境有沁水創碾磴借水勢歲破麥數千斛以給權酷先是掾吏苦出納道勞輒議均麥于民率眾力以供咸吁嗟不敢訴郡仲衍下車亟召掾吏曰太守所以便民也今掾吏顧勞民自便耶乃出教趣使復水利未幾轉運使移州以民租折供緡萬計已而又欲以他斂仲衍言歲饑民不可重困使者宜有以貸轉運使不聽仲衍愈持之卒寬民輸之半就除京東提刑懷人德仲衍逮其去也父老遮道攀車其判太常禮院時京師

有貓鼠同戲援唐崔祐甫故事請飭邊將以嚴武律  
間歲天子欲獵近郊有司豫治道設供帳久之詔蹕  
未行仲衍建白幸上早出畋有詔罷幸仲衍練達國  
朝典舊未嘗一日去書故博識無不該貫著文集二  
十卷章得象晏殊尤見獎許其牋記多出仲衍之文  
爲汴陽雜說一卷其言切于規喻又以唐白傅所撰  
事類集傳者寢舛乃參攷經史一以刊是之仍據舊  
目補攷摭新別爲三十卷曰事類後集又爲兩晉文  
類五十卷晚在山陽與侍讀錢明逸篇章寄酬凡數  
十百首曰河內唱和集又觀司馬遷班固范蔚宗所

論其中或有可疑者因摘其失折衷其義作史論三卷復取太史書采類其文章凡次成二十卷曰史記文通皇祐五年卒年四十二

華陽集晁君墓誌

楊景略字康功治平二年擢進士第知壽州安豐縣里豪有倚富冒法者以事召至庭下窮竟無罪得器服擬上方事立寘于法一邑爲之惴慄縣當水衝歲嘗病涉爲之巨橋往來者遂無患目爲楊公橋徙開封府推官就遷判官方朝廷患獄瘡之弊景略以爲護視不謹吏當繩之以法診治有瘳醫當勸之以賞詔著爲令出提點兩浙刑獄嘗言太學有歲月之限

遠方寒士或以貧或以親老不趨期請州置學官如  
太學法以便科舉元豐六年拜尚書右司郎中擢試  
中書舍人避親嫌換龍圖待制知揚州移蘇州復徙  
維揚元祐元年卒年四十七爲政嚴而不苛在郡公  
私未嘗以一毫撓民故二州之政從容若無所事而  
民自悅服至蘇未數月獄無繫者去之日吳人遮道  
涕泣及卒揚人思之不已舉州爲之設屠齋又建祠  
堂於龍興佛舍古所謂遺愛不是過也平居佔嗶之  
外無他玩好常以讎校得失爲樂事所藏書萬餘卷  
猶繕寫不輟又集周秦以來金石刻文至七十卷用

以考驗前史疏据與夫放逸之事文集十五卷西掖  
草二卷奏議三卷執政年表一卷奉使句驪叢鈔十

二卷少林居士聞見錄十卷

蘇魏  
公集

鄧忠臣字慎思長沙人自號玉池先生熙寧二年進  
士王珪門客也累官知衡陽縣大理丞元豐四年爲  
開封府界提舉司管勾官奏言祥符縣鄧公鄉大岡  
村有泉水民間飲之多能愈疾遂妄以李水子爲名  
京師內外士庶軍營子弟轉相告言今日神見某處  
明日神降某處傾動風俗結成朋社率斂財物奔赴  
鄧公鄉欲與神立廟小人緣此易生姦心神民異業

不可不禁不報

長編二  
百十二

以獻郊祀慶成賦及原廟詩

百韻擢秘書省正字元祐三年以韓川言通判瀛州

遷考功郎忠臣事母周以孝聞母卒護喪歸里飲食

起居哀慕之節皆應古禮有學行能文長于雜記嘗

註杜詩又留心晉史元祐中充注晉史官申省乞差

劉躋蘇象先王摭白時中充晉史檢校官爲姚勳所

劾崇寧初權發遣汝州初范純仁薨謚曰忠宣忠臣

爲謚議有曰每思捐身而獻策常願休兵而息民祇

知扶危而濟傾盍值跋前而蹙後又曰方議言亂國

而明蔡確之無實洎姦黨投石而謂六防之可原當

眾人莫敢言之時在偏州無可用之地義形正色憤  
激至誠非特救當世正人端士之網羅直欲戒後世  
亂臣賊子之迷罔徇公忘己爲國惜賢又曰父母之  
國有時而去股肱之義於是或虧放之江湖忽如草  
芥初蘭澤畔更甚屈原之忠占鵬坐隅已分賈生之  
死又曰側席南望而挾浮雲之蔽趨節東歸而詠零  
雨之濛又曰法座想見其風采詔書相望於道塗元  
年十二月臣僚上言純仁謚已追奪定議之博士覆  
議之郎官各罰銅十斤忠臣坐是罷爲管幹南京鴻  
慶宮三年添入黨籍後贈直秘閣著有玉池集

書錄  
解題

參湘陰縣志能改齋漫  
錄通鑑長編墨莊漫錄

華鎮字安仁會稽人登元豐二年進士第官至朝奉  
大夫鎮好學博古工於詩文一時名人宗師多稱道  
之嘗爲會稽覽古詩凡百餘篇山川人物上自虞夏  
至於五季爰暨國朝苟可傳者皆序而詠歌之歷按  
史策旁攷傳記以及稗官瑣語之所載咸見採摭富  
崧卿稱其詞格清麗興寄深婉是以垂觀來者子初  
平登大觀三年第爲太常博士討論典故據經考古  
無所阿附靖康初爭金人尊號貽怒當塗及都城失  
守二聖北狩初平竟以憂憤而卒

會稽  
續志



謝逸字無逸臨川人自號溪堂少孤博學工文辭操履峻潔再舉進士不第黃庭堅嘗曰使斯人在館閣當不減晁張李商老謂其文步趨劉向韓愈所著書有春秋廣微樵談溪堂集其他詩啟碑志雜論數百篇淳熙中繪像祠於郡學

江西通志

逸弟適字幼槃自號竹友嘗爲漕司首薦省闈報罷以琴奕詩酒自娛詩文不亞其兄時稱二謝呂本中云無逸似康樂幼槃似元暉又云二謝修身勵行在崇觀間無所汙染不獨以文見稱著有竹友集十卷

江西通志

何去非字正通福建浦城人累舉進士不第元豐五年以特奏名廷試考官曾鞏奏有累舉之士一人所論用兵之要非通儒碩學不能及神宗覽而異之後數日神宗御集英殿賜第乃得去非名卽引對殿陛問曰昔嘗遊邊乎對曰臣生長閩粵每恨未識邊防制度又問何以知兵對曰臣聞文武一道古之儒者未嘗不知兵神宗喜顧宰執優與之官或奏宜授武職使效所言除右班殿直武學教授使校兵法七書書成奏御得旨褒賞官制行改武學博士遷左侍禁元祐四年翰林學士蘇軾狀奏去非在武學今已八

年臣嘗見其著述材力有餘識度高遠所論歷代廢興成敗出人意表雖喜論兵然本儒者不樂爲武吏欲望聖恩特與換一文資令充太學博士以率勵學者詔加承事郎歲餘出爲徐州教授軾復奏州學教授比於博士乃似左遷恐朝廷不見去非文章無以較量其人臣謹繕寫去非所著備論二十八篇附遞進上乞降付三省執政考覽如臣言不謬望除一館職非獨收羅逸才風曉士類亦以彰先帝知人之明不報秩滿知杭州富陽縣收課爲一道最厯通判廬州卒年七十有三去非廉勁踔悍於書莫不通曉軾

每稱其筆勢雄健得楚漢閒風力其所論撰雜之載

集中人亦不能辨也

福建通志

黃裳字冕仲福建南劍州人未第時嘗作遊仙記傳於京師神宗覽而愛之元豐五年禮部奏進士有裳名及進讀廷試策凡在前列者皆不稱旨令求裳卷至第五甲始見神宗曰此乃狀元也擢爲第一考官以高下失實皆罰銅紹聖末權兵部侍郎元符二年兼權吏部侍郎徽宗卽位累轉工部禮部侍郎求外補未行留爲禮部尙書會朝廷議推太學三舍法於天下裳謂宜近不宜遠宜少不宜老宜富不宜貧不

如遵祖宗科舉之制不聽久之句祠提舉杭州洞霄宮政和四年以龍圖閣直學士起知福州宣和七年進端明殿學士再領宮祠自號紫玄翁建炎二年乞致仕轉正議大夫卒年八十有七裳在政和間嘗言聖人不畏多難而畏無難備豫不虞古之善教天下無事而爲有事之備則可以坐享太平又言雄州弓箭手趨捷勇健北敵畏憚請增額選募分屯邊郡又言東南城池頽毀無戰守具萬一姦人竊發懼無以制其後方臘作亂連陷州縣金人叛盟長驅深入悉如所論人以裳言不見用而老於州郡爲可惜也著

有演山集六十卷

演山集  
參閱書

李彭字商老南康建昌人祖常宋史有傳彭詩文富  
瞻宏博鍊錘精研句多警江西詩派居第九在韓駒  
之次集中多與蘇軾黃庭堅呂本中陳師道張耒何  
顛徐俯韓駒蘇庠謝邁相唱和時蘇庠居廬山以琴  
書白嫖與彭齊名時稱蘇李著有日涉園集書錄解  
題參雲  
龍漫鈔日字有鍾王之風自言法右軍之瞻麗用魯  
涉園集  
公之氣骨獵奇峭于誠懸體韻度于凝式灌園修水  
之上筆畫一出人爭傳寶書史會要參  
石門文字禪  
馮正符字信道遂寧人其父堯民字希元爲鄉先生

正符學于安逸處士何羣三上禮部不第教授梓遂  
間閉戶十年著春秋得法忘例論凡三十卷及詩易  
論語解蜀守何邾首以其春秋論上之熙寧九年用  
御史鄧綰薦召試舍入院賜同進士出身授蜀州晉  
原主簿鄧綰尋被謫正符坐附會奪官歸時王安石  
不喜春秋而正符所著於春秋特詳其書首辨王魯  
素王之說及杜預三體五例何休三科九旨之怪妄  
穿鑿其說務通經旨不事浮詞皆正論也

遂寧縣志

王令字逢原祖居魏之元城叔祖父乙居廣陵令幼  
育於乙遂爲廣陵人年十數歲晝從羣兒嬉夜讀誦

書往往達旦不眠未嘗從師爲辭章卽雄偉老成稍  
長僮僕不羈束周鄉里之急爲不義者面加毀折無  
所避人皆畏而服之里人滿執中謹厚人也一日責  
令所爲非是令因自悔更閉門讀書久之所得益闕  
深乃作竹賦以自廣其姊寡居貧無以自存乃聚徒  
天長教其孤兒如己子已而積薪之中得芝一葉著  
藏芝賦王安石赴召道由淮南令赴南山之田詩安  
石見之期其才可與其功業於天下因妻以其夫人  
之女弟旣而徙高郵太守邵某延請主學令辭不獲  
已彊應之尋亦辭去邵爲部使者以其節行聞於朝



廷不報令既喜退隱思江南山水之勝乃居潤賦江  
上山中之詞居頃之熟於潤之山水道里著遊山記  
以寓其意居無何以江陰幽僻乃遷江陰江陰地下  
濕苦足疾後居常州而終婦吳歸令一年而寡歸廣  
陵治田桑布素以待盡其趨操議論說者謂宜爲令  
婦也著有王令集二十卷廣陵文集六卷論語注十  
卷孟子講義五卷

劉發廣陵先生  
傳宋史藝文志

袁百之字必強其先許人後徙雍邱少奇穎登進士  
第調郡曹歷縣令遷幕府以選再爲州教授天性孝  
愛已壯猶嬉戲親側如兒時仕宦常擇比近率五日

一通訊過期皇皇不能以日母喪哀毀勺飲不入口  
三日爲人美風致夷然蕭散善談笑博學軼於文辭  
嘗讀董生仕不遇賦歎曰命在天不遇其何憂道在  
我奚往而不可樂又方以天下爲憂安知遇之非憂  
方自樂其樂安知不遇之非樂迺作樂不遇賦其辭  
類騷眉山蘇公見之笑曰不見此作久矣平居恂恂  
需緩至遇事侃然不爲飢餓逢州遞卒盜貸所護錢  
當死百之爲掾謝之曰錢委窮卒實誨之盜乃與寇  
同抵罪死非法意州不聽固爭且曰終不以一官易  
七人者命竟論減死其後坐失出免官元祐六年卒

年四十四

學易集袁君墓誌

馬存字子才樂平人元祐三年進士省試論以揚雄劉向爲題存論曰方王莽以險怪愚弄天下學士大夫高節尙潔者非引去則繼以死龔勝以清死鮑宣以悍死其憤甚矣雄斯時方著劇秦美新論以發揚其盛讀之令人氣拂膺不懌者累日嗚乎雄乎甯死爾其忍爲此文哉典舉蘇軾奇之置高等京師競傳因呼爲拂膺公廷試策言臣之深思常略於東南而獨在北方詳定官蘇轍喜其遠慮欲以冠多士同列間之抑居第四授鎮南節度推官再調越州觀察推

官紹聖三年卒存蚤遊太學研經以考道觀史以究  
治亂之變搖毫頃刻數千言文學錡一時文集二十

卷行世

江西通志  
人物志

林慮字德祖長州人慮少穎悟絕人能傳父祖業伯  
父希嘗獲古鏡背有龍朔二字慮從旁曰是非唐大  
帝時物乎希奇之曰是兒眉過於目當復以文名可  
繼其祖矣遂以德祖字之既長益刻苦自淬厲故其  
學早成登紹聖四年進士第除潤州教授入爲太學  
錄復教授常州常號多士籍於學者千餘人時方以  
三舍取士乃身爲勸率從者風靡大觀三年廷試常

士預選者五十三人上賜詔曰進賢受上賞知州教  
授特轉一官慮由奉議郎改宣德郎知州徐申於學  
南立進賢坊榮賜亭以侈之在職六年學者信服遷  
揚州教授擢河北西路提舉學事陸對日上首以久  
厯師儒顧問甚渥且使徧行所部推廣風旨慮頓首  
奉詔因請加鄒兗二國公諡復捐公廩菜圃歸於學  
除開封府左司錄以府尹不之禮上章請老夜自書  
牘旦報可家人無知者卽日束裝出國門士大夫奔  
走出餞皆不及旣歸杜門一室不入州縣無一言及  
時事爲人強敏有志操自六經諸子而下錯綜貫穿

無不記誦爲文章捉筆數百言閱易敷暢初若不經  
意然論辨研覈皆有抵宿晚好浮屠說不肉食者十  
四年始疾卽不呼醫逮卒弗亂年六十六所居大雲  
坊自號大雲翁

盧志

商倚淄川人元祐八年官太學博士與張文潛晁無  
咎鄧忠臣相唱和紹聖四年爲秘書省校書郎通判  
保州建中靖國元年爲殿中侍御史九月上書曰  
朋黨之論不朝廷患臣不敢  
之變爲今日戒臣竊觀紹聖元符間  
朋黨之作豈朝廷所欲爲哉亦有傾危變計之

士以飛箝掉閭術奔走一二權臣之門陳謀獻計以意求合務希寵利遂使縉紳之禍繼乎朝廷而班列爲之一空五六年間海內多故君臣無間暇之日此陛下所親見也伏自陛下卽位以來治尚簡靜以與天下休息更革庶事唯務便安選用羣臣不間新舊任賢以勿貳去邪以勿疑由是朋黨之論不攻而自判天下士大夫始得安枕而寢比奉明詔以謂爲政取人無彼時此時之別又以建中靖國元年爲紀年之號則陛下切於致治之意蓋已甚矣然臣竊聞近士人中或有乘時射利之徒伺候府第出入權門

或巧締讒言以中人或妄生虛譽以舉類或倡異同  
之論以潛惑上聽或騰反覆之說以陰動柄臣或執  
異見欲以混淆人物之正邪或聘曲辯欲以變更朝  
廷之好惡假浮譏以奪正任私意以亂公轉是作非  
駕虛爲實豈顧紛紜之言■唯期■附以進身■黨與  
漸成必壞風俗不行禁飭曷底■■■陛下聽覽  
之際聖慮先及仍詔中書門下特行■■■■■  
朝堂庶以少慰中外士大夫危疑之心知朝廷深惡  
■■之■使善人君子可以存立則大中之道何患  
不■建唯陛下察之崇寧三年入黨籍通鑑長編參  
楊仲良紀事



本末諸  
臣奏議

曾紆字公衮號空青世家撫之南豐丞相布之第四子也年十三伯父鞏授以韓愈詩文學益進以父任爲承務郎除太常寺主簿左司諫江公望薦紆累數百言不敢以宰相子爲嫌布免相言者指紆嘗夜過韓儀公家議復瑤華事且受父客金入元祐黨籍竄永州會赦復承奉郎監潭州南嶽廟簽書甯國軍節度判官通判鎮江府會淮南漕渠不通泗楚州連數守罷發運使陳亨伯密奏移知楚州紆因荒政役饑民渠通而民活者不可勝計因加直秘閣移秀州未

幾提舉京畿常平江南東路轉運判官陞副使罷歸  
主管南京鴻慶宮屏居湖州建炎三年苗傅劉正彥  
反呂頤浩張浚檄諸州勤王檄至湖州守梁端會士  
大夫謀之眾未及言紆奮然曰逆順明甚出師無可  
疑者數日苗傅來取兵紆請端械繫使者毋令還高  
宗反正御史張守白發其忠除直顯謨閣江南東路  
轉運副使盜孫誠等暴誘屬邑一方騷然紆作聖旨  
招安單舸見之諭以禍福誠等望風迎拜紆上書請  
矯制罪上廉而釋之未幾隆祐皇后崩監護使李回  
辟爲修奉議者欲禰園陵紆曰上不日恢復中原奉

隆祐歸祔此特橫宮耳當先正名朝廷用其言聞者服其得體提舉明道宮甫兩月起知撫州除江南西路轉運副使明年除司農少卿改福建路提點刑獄明年進直寶文閣知衢州未之官卒年六十有三紆才高識明博極書史其謫永州也黃庭堅魯直得其詩而愛之手書於扇紆之叔父肇不妄許可人嘗曰文章得天才當省學問之半吾文力學至此耳吾家阿紆所得超然未易量也故詩文每出人爭誦之篆隸行艸沈著痛快得古人用筆意

浮溪集會  
公墓誌

著有空

青遺文十卷

黃策字子虛蘇州人九歲能屬文書追和梁昭明所  
選詩持見蘇軾軾曰子異時必以文顯弱冠擢第歷  
雍邱主簿齊州教授元符末詔中外言事時昭慈聖  
獻皇后既復位號而典冊未有盡正者策引古誼上  
書甚切蔡京深銜之崇寧初入黨籍邪上尤甚第二  
十八人羈管登州會赦還後爲發運司屬官斥賣京  
家賞得京草復元祐皇后制所錄上皇聖語親劄副  
本上進見神宗悔悟之心欽聖詔復之旨隆祐誣抑  
之由由是京主並后以遂復廢之姦益明建炎中追  
錄黨人除直秘閣通判嚴州初欽宗在青宮時聞策

名大書隨緣堂三字以賜因自號隨緣居士

姑蘇志卷四十一

九紹興二年卒

汪文定集黃師聖墓誌

王鞏字定國莘縣人父素宋史有傳鞏篤學力文志

節甚堅練達世務彊力敢言吳充馮京器其爲人

東坡

集樂城集

上書言事多切時病京薦于上王安石沮之

老學

庵筆

累官大理評事熙寧八年坐見徐革言涉不順

而不告追兩官勒停

長編二百六十二

尋爲秘書省正字九

年坐借趙居兵書追兩官勒停元豐二年敘復太常

博士坐與蘇軾交通受誘訕文字不繳又受王誅金

謫監賓州鹽酒稅

通鑑長編

一子死貶所一子死于家

東坡

序 鞏安患難不戚于懷初王氏父子以經術得幸下

其書于太學凡置博士試弟子皆以新書從事不合

者黜之鞏處放逐

秦少游論語註序

更刻苦讀諸經頗立訓

傳以示意

山谷集

成論語註十卷自信不惑成一家之

言請閣門奏上之三年歸來

秦少游序

氣益剛實

劉摯日記見長

編四百五十九

言事如故

樂城集

司馬光喜之待以國士

東坡集

元祐元年

長編

言之朝廷擢宗正寺丞

樂城集

疏論宗室

疎遠者不當禰皇伯皇叔言者撫其疏指爲離間宗

室除揚州通判

長編二百九十二

參東坡集

在任皎皎府賴以治

更謝景溫王安禮二守皆相喜因有少年之過代還

四年除知海州不滿意呂大防愛其才改知密州到官數月言者交攻罷歸因恩例乞得管勾太平觀

劉摯

日五年起判登聞鼓院朱光庭言未協公議詔別差

遣長編四百四十五謝景溫薦其有政事才通判揚州在官

無過四百四十六蘇轍言鞏之所長人所難能所短或少

年所不免乞加錄用六年除知宿州四百五十二安鼎姚

勛論鞏在揚州日交通州吏馬守珍踰違公事詔罷

新命依舊管勾太平觀長編四百五十九改朝奉郎管勾鴻

慶宮紹聖初爲滎州簽判長編五百四十四鞏跌蕩傲世

好臧否人物其口可畏以是頗不容於人劉摯每除

官輒爲言者所論故終不顯

宋史

元符元年坐元祐中

及元豐末累上書議論朝政欲盡變先朝法度追毀

出身以來告敕除名勒停送全州編管徽宗立復朝

散郎崇寧元年送吏部與合入差遣入黨籍

長編參紀事本

未鞏生長富貴所好皆老書生事

山谷集

長于詩

宋史東

坡歎爲不及

墨莊漫錄

他文章不守近儒繩尺欲以雄長

一時

山谷集

小草有高韻

宋書錄

著有論語注十卷聞見

近錄一卷甲申雜記一卷隨手雜錄一卷



宋史翼卷二十六終

男樹麟校字

宋史翼卷二十七

陳懿恭公  
列傳第二十七

文苑二

洪朋      洪炎      高茂華

雍孝聞      慕容彥逢 孫綸      于世封 正封

毛滂      林宋卿      葉廷珪

朱翌      傅嶽卿      徐兢

王洋      董道 子棻      黃次山

王昇      任申先      康與之

鄭厚

王銍

畢良史

周紫芝

洪朋字龜父南昌人父民師爲石州司法參軍性孝以毀卒朋幼孤受業於祖母文成君李氏手不釋書落筆成文尤長於詩舅黃庭堅嘗謂龜父筆力扛鼎異日不患無聞兩貢禮部不遇早卒遺稿有清非集

江西通志

洪炎字玉父與兄朋弟芻羽俱以文詞名世號四洪舉進士爲穀城令坐以兄弟罹元祐黨同貶竄復知潁上譙縣並有循政累官著作郎祕書少監高宗初

召爲中書舍人時方倥傯除目填委炎操筆立成訓

詞典雅同列歎服有西渡集嘗編列仙歷儒事蹟三

卷號塵外記又手錄雜家小說行於世

南昌耆舊記  
江西通志

高茂華字秀實元氏人祖化始徙祥符茂華人物高

遠有出塵之姿其爲文稱是嘗和呂本中高郵道中

詩有中塗留眼占星聚一夕披顏覺霧收之句與曾

元嗣續關止叔沼呂本中居仁韓子蒼駒顏平仲岐

饒德操節爲十友崇寧元年臣僚上言希與韓忠彥

李清臣交近爲私結爲死黨使其子壻吳則禮外甥

高茂華往來計議共成元祐之黨崇寧三年入黨籍

五年敘復承議郎

長編參紀事本末庚溪詩話雜助集高旦墓誌

雍孝聞四川閬州人元符末有聲太學學者推重之  
崇寧初省試第一殿試策中方詆二蔡及時政未便  
者徽宗大怒減死竄海外宣和末上思其忠批云雍  
孝聞昨以上書致罹刑辟忠誠可嘉特開落過犯授  
修武郎閩門宣贊舍人命殞而孝聞死

揮塵前錄

慕容彥逢字叔遇常州宜興人六歲默識彊記讀書  
一再過輒不忘有異人語其父曰是兒手有從理足  
有二黑子他日必貴視之信然元祐三年進士調主  
池州銅陵簿遷知鄂州崇陽縣紹聖二年中宏詞科

改越州州學教授刊印三史警校精審遂爲善本四方士大夫爭購求之元符元年遷太學博士崇寧初賜對便殿言邇來學者程文往往尙浮靡畔經術願詔有司凡選擇務先理教後文采詭僻不醜者黜之詔從其請除秘書省校書郎三遷至左司諫章數十上後言執政蔡京當去上亟罷之論議堅正風望隱然擢中書舍人大觀元年春除尙書兵部侍郎蔡京復言官希京意誣以他事劾之遂力請外出知汝州政和元年復以吏部郎召明年擢刑部尙書七年卒年五十二諡逢友愛三弟甚至講習琢磨以身率之

皆有名廷賞不先與子必徧遠同氣飲食衣服必均  
絕甘分少迨貴猶然暫不見卽惘惘若有所失太常  
議諡法曰德美才修曰文能善兄弟曰友諡曰文友  
幼嗜學問晚節益篤藏書數萬卷朝夕繙閱經史諸  
子靡不洽通故發爲詞章雅麗簡古無世俗氣尤長  
於辭令典嚴溫厚褒貶無溢言詔命或叢委操筆立  
成每一篇出多士口傳上尤愛其文以爲有古風往  
往摘訓辭之善者稱賞之有文集二十卷外制二十  
卷內制十卷奏議五卷講解五卷孫綸淳熙中知象  
州搜訪于兵火之後編爲摛文堂集三十卷

摛文堂  
集附墓

誌

于世封正封浦江人皆舉進士世封能暗記六經三  
史正封尤以博洽自負每兄弟論辨旁引曲證各歷  
誦全文一字不遺人號爲雙壁初世封善屬文頃刻  
數千言縱橫變通無不如意自以爲所向無敵及同  
正封見歐陽脩脩不然之世封慚修因授以爲文之  
道世封之學於是益進晚乃著易書詩傳四十卷正  
封著春秋三傳是非說二十卷正封善正書酷類顏  
真卿世多傳之

浦陽人  
物記

毛滂字澤民江山人元祐中爲杭州法曹東坡爲守



誇沃滿去會有歌贈別小詞東坡問誰作以毛法曹對坡語客曰郡僚有詞人而不及知某之罪也翼日折簡追還留連數月滂因此得名官至祠部員外郎

知秀州有東堂集

衢州府志

林宋卿字朝彥福建仙遊人崇寧五年由舍選登進

士第授睦親北宅宗學博士召試祕書省正字歷官

翰林權直

宏治興化府志云權直翰林學士院案宋史職官志凡他官入院未除學士謂之直

院學士俱闕他官暫行院中文書謂之權直涪熙五年議者以翰林乃應奉之所非專掌制誥之地更爲學士院權直據此則徽宗朝權直銜不帶學士院王邁羅軒集跋林學士宋卿帖稱學士者蓋邁以南渡後官銜稱宋

卿非其實也

出知恭州時邊臣多以拓土蒙賞邁南

帥司奏開溪費州南通辰沅西抵瀘戎置一州二縣

夔梓二路聽其節制

溪州自治興化府志作溪費州八閩通志闕書皆同攷楊龜山

文集向子韶墓誌云瀘南帥劉亞夫用夷冉萬奕議請開溪州路卽此事也唐有費州其地在涪州間宋時州廢正屬夔州路溪州或與費州故址相近亦未可知然以子韶墓誌證之則當時所議開者惟溪州也

宋卿上疏反覆數千言大略謂溪州與徭夷比鄰

遠行檢踏恐夷人疑惑別生事端得其地不足耕得

其民不足治若不杜窒其源則邀功起釁者眾豈不

蹶喪六十州生民命脈微宗覽疏惻然詔罷其役以

宋卿兼提舉夔州潼川府路兵馬都監仍知恭州宋

卿嘗從將參揚時學及是時聞之日朝彥真百鍊鋼

也未幾思州納土夷官田祐恭與弟祐祥爲怨家告  
密提刑使者欲置極典朝命宋卿讞其獄宋卿至察  
其註誤者釋之以事關邊防乞從末減奏至徽宗大  
喜時尚書省劄下夔州路敏十萬緡充燕山軍需宋  
卿上言保障薩絲當權輕重夔門至隘人心易搖末  
產下戶當爲蠲削專遂寢復奏蠲恭民宿逋自受俸  
外非祿令所著者一介不取家繪生祠奉之靖康中  
爲言者所讒衝替僑寓涪陵之韓亭日與士大夫唱  
酬歌詠以自適涪人以宋卿才學出處與黃魯直相  
先後因號爲小涪建炎三年涪守王擇仁薦宋卿學

識純正氣節剛方可備中興任使河北帥臣奏兵興  
機密帥幕參謀以儒知兵以節全城無出宋卿右者  
得旨差充湖南安撫司參議紹興五年張浚以尙書  
右僕射都督諸路軍馬宋卿條湖北事宜及兵籌五  
利等事浚還朝首薦之宋卿立祠歸里未幾卒官終  
朝請大夫宋卿登第後娶福清鄭俠孫女所得匱資  
盡斥之以贖寒峻出京者人歎其高誼嘗西歸道出  
通州與同年廖剛語陳瓘曰頭項直宋卿言下領悟  
故立朝行已多遵瓘護以風節著

福建  
通志

葉庭珪字嗣忠建寧人政和五年進士除武昌

丞時方興燕山之役廷珪資餉饋運不失轉知德興  
縣張邦昌偽詔至不拜後知福清縣民困鬻鹽廷珪  
請增鹽錢又採煮鹽利言作圖及書州縣遵用之紹  
興中召爲太常寺丞遷兵部郎中

福建通志參  
萬姓統譜

十五

年轉對言比者專尚文德天下廓廓無事然芸省書  
籍未富切見閩中不經殘破之郡士大夫藏書之家  
宛如平時如興化之方應彰之吳所藏尤富悉其善  
本望陛下逐州搜訪抄錄從之

要錄一百  
五十三

議論與秦

檜忤

萬姓  
統譜

十八年秋以左朝請大夫知泉州鎮靜不

擾後移漳州奉祠歸廷珪童時知嗜書宦游四十餘

年未嘗一日釋卷食以飴口怠以爲枕雖老而不衰  
每聞士大夫家有異書無不借借無不讀讀無不終  
篇嘗作數十大冊擇其可用者手抄之名曰海錄其  
文多成片段者曰海錄雜事其細碎如竹頭木屑者  
爲海錄碎事其未知故事所出者曰海錄未見事其  
事物興造之原曰海錄事始其詩人佳句爲前輩稱  
道者曰海錄警句圖其有事迹著見作詩之由者爲  
海錄本事詩

海錄碎  
事自序

其詩老而益工未嘗一日不作

用事精當寓意清高置于唐人詩集中幾不能辨更  
部郎宋喬年喜稱其詩河陽傅自得寓泉州與之往

還見輒論詩

傳自  
得序

名重當時陳俊卿黃祖舜鄭丙皆

出其門

萬姓  
統譜

朱翌字新仲鄞縣人自號瀟山居士漢桐鄉畜夫邑  
之後世家安慶之懷甯晚卜居於鄞父載上司農卿  
嘗從蘇軾黃庭堅遊翌爲學淵源出晁說之著作有  
元祐遺風政和八年年二十三以太學生賜第初任  
溧水主簿爲江甯王彥昭幕官高宗南渡爲祕書監  
屬建太學載韓厥於祀典皆翌發之預修徽宗實錄  
時范冲領史局翌以文詞進剛潤功居多高宗屢獎  
之歷官中書舍人文采聲華傾動一時在朝敢言事

嘗奏論信夷狄太堅待虜使太厚排眾論太切姑息諸將太深待大臣太嚴立志太弱秦檜相逐趙鼎以鼎黨貶韶州斥久窮極益自刻苦倡明理學粵東化之在韶十九年名山勝景遊覽殆遍詩益老文益奇遂以名家起知嚴州甯國平江三郡當初起時朝廷憫其饑寒計貶所衣俸悉與之其在平江擢節浮費積緡錢四十萬尋奉祠歸高宗視師江上後守獻翌積錢有詔嘉獎起知太平潭泉三州皆不赴家居食指甚繁往往炊烟不繼性又好賓客因作信天緣堂以寄意爲文記之示子孫又嘗言人生壽夭不齊



姑以七十爲率十歲爲兒童父母膝下乳哺衣食以須成立其名曰生計二十爲丈夫骨強志堅問津名利之場意在千里其名曰身計三十至四十日夜注思擇利而行位欲高財欲厚門欲大子孫欲盛其名曰家計五十之年心怠力疲俯仰世間智術用盡過隙之駒不留當隨緣任運息念休心善刀而藏如鷄作菑其名曰老計六十以往甲子一周夕陽銜山倏爾就木內觀一心要使絲毫無慊其名曰死計七十以此語人翌飽諳世故晚歲見道號省事老人乾道三年卒年七十一將終自識其墓官至敷文閣待制

累贈少師子軼類斐遺稿周必大序之論其詩如杜

牧之而出處亦相類云軼字叔止慶元三年官贛州

通守嘉泰間知南劍州奉祠

寶慶四明志參元祐四明志周必大平園類稿

居通諫萬姓統

傅崧卿字子駿山陰人省試第一擢甲科除辟雍正

改婺州州學教授遷國子正充校正御前文籍以憂

去職服除召爲考功員外郎兼太子舍人方士林靈

素得幸造符書號神霄籙自三公輔臣以下皆從靈

素師授崧卿與曾幾獨不行被謫出爲鄂州蒲圻縣

丞高宗初除知太平州數日罷久之召爲中書門下

省檢正諸房公事詔問羣臣居建康與趣鄂岳吳越孰便崧卿以建康古建國宜定基本以濟中興爲對虜渡江上自越將幸四明崧卿殿對願得乘障盡死乃以爲浙東及衢信州防邊使明年罷防邊使除直龍圖閣知越州上自永嘉還越供億用度崧卿乞悉從蠲減雖中旨有不便輒執奏皆賜可改知婺州召拜祕書監兼權戶部侍郎尋除宣諭淮南東路左僕射呂頤浩都督江淮荆浙諸軍事崧卿以敵缺閣待制充參謀官頤浩還行在以崧卿管都督事尋權知建康府有言使淮南日奏事失實降秩提舉洪州玉

隆觀頤浩安撫荆湖更辟參謀官詔復集英殿修撰  
固辭不拜久之召爲中書舍人詔以強敵入寇將親  
撫六師崧卿入對言留都管鑰旁郡輔翼當及變興  
未發亟圖之庶無後慮上稱善進給事中兼史館御  
史常同論其懷姦如王安石罷歸崧卿謂鄉人曰王  
公名世大儒言者以僕比之但有媿耳怡然不少動  
崧卿自國家多事常慷慨欲以功名自見與客言及  
國事輒憤託或至流涕覽鏡見齒髮衰皓歎曰吾遂  
無以報國家而死乎在上前論議尤感激未及大用  
而卒時人惜之有樵風溪堂集六十卷奏議十五卷

西掖制誥三卷又作夏小正傳最行於世

會稽志

徐兢字明叔又號自信居士和州歷陽人後遷長洲  
幼穎異不羣年十八入太學以父直祕閣閔中任補  
通州司刑曹事辟入阮治司幕攝知雍邱事民服其  
化賦訟衰止京西使者以佞倖進遣逃卒二百輩築  
室邑中肆爲盜暴一邑大擾兢捕治之使者託上冢  
得旨抵邑縱其徒鼓噪入獄盡解所縛兢曰位無高  
卑遵三尺法奉天子均也密掩其室復得凶黨聞于  
所屬置之法治譽著聞移攝原武縣時有挾其弟貴  
勢者威震郡邑檄邑治市炭後至與慢令者兢疏其

善聞諸朝願以身贖無辜鄭竦謂同列曰使君令管  
如徐兢天下其有不治乎宣和六年高麗入貢以兢  
爲國信使提轄官隨路允迪報聘撰高麗圖經四十  
卷上之徽宗覽書大悅召對便殿賜出身擢大宗丞  
兼管書學以篆名家自署曰保大騎省世家遷刑部  
員外郎以時相冊免坐親嫌謫監池州永豐監起除  
沿江制司參議奉祠吳中治園數十畝名洗硯池幽  
勝聞江南紹興二十五年卒年六十三兢文詞警敏  
下筆不能自休尤長于詩過西楚霸王廟留二十八  
字韓愈長之三變人不可措筆矣畫入神品山水八

物皆冠絕人請就爲學省後身初試中命題題感室  
墓碑不能成禱于佛天殿若心經習書之至寶字見  
風幡飛動因悟體勢自此擢天下重名貴宗尤所愛  
賞召至禁中命書進德修業四字字長丈許至業字  
特出奇變行筆之敘留中最後落修勁端直如圓石  
墜千仞上駭異稱善

張孝伯作  
公行狀

王洋字元渤山陽人宣和六年進士紹興五年以修  
職郎召試館職六月除祕書省正字二年正月除校  
書郎五月除吏部員外郎尋守起居舍人二年十月  
詔羣臣條缺失洋請官五代九國子孫上以洋姑應

詔曰言無可取降一官旋坐草方閣張綱改官制詞  
溢美罷爲直徽猷閣主管台州崇道觀十一年起知  
邵武軍奏言近蒙恩詔貧乏之家生男女不能養贍  
者人於免役寬剩錢內制四千可謂仁德甚厚矣然  
免役寬剩州縣所收甚微勢不可久乞鄉村之人無  
問貧富凡孕婦五月卽經保申縣專委縣丞注籍其  
夫免雜色差役一年候生子日無問男女第三等已  
下給義倉米一斛縣丞給食錢十千專掌附籍所掌  
萬戶已上歲及千人便與改官蓋義倉米本不出糶  
今州郡尙有紅腐去處二郡歲發萬斛可活萬人通



數路計之不知所活其幾何也又縣尉終任獲強盜  
七人便許改官今使縣丞終任活一二人俾之改  
官亦豈爲過又義倉之米若有不繼逐年隨苗量添  
升斗積活民民自樂從再三審度實可經久

繫年要錄一百

九十從之有袁氏者夫死詣庭投牒丐他適見袁經

之下紅裳微露且無戚容械訊之乃毒死其夫問如

律

福建通志

旋移知吉州下車首以禮幣邀王庭珪虛正

堂延訪政事卽學宮聽講經一時士大夫多爲歌詩  
以紀其盛移饒州洪忠宣爲秦檜所忌無敢過其居  
者洋獨修舍蓋故事適通判州事李勤與洋積不相

能許忠宣有欺世處語洋與聞之坐是十五年罷爲  
直徽猷閣主管台州崇道觀寓居信州上澆之南池  
有荷花水木之勝因號王南池關宴坐一室號半僧  
寮與呂本中曾幾相唱和善詩著有文集三十卷紹  
興二十三年卒繫年要錄參周益公文集王右司文集序澗泉日記江西通志胡澹庵集  
王庭珪  
墓誌

董道字彥遠山東東平人徽宗時官校書郎蔡居安  
會館職食瓜令坐上徵瓜字居安所徵爲優欲畢彥  
遠連徵數事皆所未聞悉有依據後數日補外王明清撫  
塵前靖康中爲國子監祭酒建炎元年四月率諸生

宋史翼

卷二十七

十三

至南京勸進除宗正少卿二年五月除江東提刑旋

召爲中書舍人充徽猷閣待制

建炎以來繫年要錄

著有廣川

易學廣川詩學廣川書跋畫跋藏書志

直齋書錄解題及卷三吳

感論語續

等書

解題

子蔡字令升宣和中官鎮江府學教授丹徒人李迎

高尚不出蔡白太守虞奕訪之

嘉定鎮江志

紹興初累官

提點廣西刑獄公事時高登爲賀州富川簿蔡聞其

名檄兼賀州學事

宋史高登傳

三年十二月廣南宣諭使

明棠奏蔡公正奉法特立不羣廣西州縣姦貪成風

其間能循守吏所恃以安職者蔡一人而已紹興四

年以趙鼎薦擢吏部員外郎奏言仰惟太祖皇帝受  
天明命削平僭亂混一區宇建萬世不拔之基垂子  
孫無窮之祚卽功德所起則有同乎周之后稷乃若  
因時特起之蹟則無異乎漢之高帝魏晉而下莫可  
擬論是宜郊祀以配上帝祫享以居東鄉之尊傳千  
萬世而不易者也國初稽前代追崇之典上及四世  
故於祫享用魏晉故事虛東鄉之位逮至仁宗皇帝  
嘉祐四年親行祫享之禮嘗詔有司詳議太祖皇帝  
東鄉用昭正統之緒當時在廷多洪儒碩學僉謂自  
古必以受命之祖乃居東鄉之位本朝太祖方受命

之若若論七廟之次有僖祖以降四廟在上當時大  
貽止列昭穆而虛東鄉蓋終不敢以非受命之祖而  
居之允協禮經暨熙寧之初僖祖以世次當祧禮官  
韓維等據經有請援證明白適王安石用事奮其臆  
說務以勢勝乃俾章衡建議尊僖祖爲始祖率居東  
鄉神宗皇帝初未以爲然委曲訪問安石乃謂推太  
祖之孝心固欲尊宣祖自宣祖而上孝心宜無以異  
則尊僖祖必當祖宗神靈之意神宗皇帝意猶未決  
博詢大臣故馮京奏謂士大夫以太祖不得東鄉爲  
恨安石肆言以折之已又欲罷太祖郊配神宗以太

祖開基受命不許安石終不然之乃曰本朝配天之禮不合禮經以此事未害逆順大倫姑未暇釐正一時有識之士莫敢與辨元祐之初翼祖旣祧正合典禮至於崇寧宣祖當祧適蔡京用事一遵安石之術乃建議請立九廟自我作古其已祧翼祖及當祧宣祖並卽循舊沿至今太祖皇帝尙居第四室遇大禘處昭穆之列識者恨焉臣竊謂王者奉先與臣庶異必合天下之公願垂萬世之宏規匪容私意於其間祖功宗德之外親盡迭毀禮之必然自古蓋未有功隆創業爲一代之太祖而列序於昭穆之次者也亦

宋有非受命而追之祖居東鄉之尊歷百代而遷者  
豈是正闕違以契天人之望理固有待陛下孝通神  
明治法祖宗光紹丕圖中興聖緒嗣服之初郊見天  
地寅奉太祖以嚴配祀載舉合宮之祭仍修並配之  
儀亶諧公願茲者當官方駐驛之地肇建太廟以時  
享獻用昭奉先之孝帝王盛德曷以加諸然則辨廟  
祧之次尊受命之祖固當遠稽前代上憲祖宗以時  
釐正況今告朔時享薦新之禮旣略舉矣大禘之祀  
獨闕而未講誠欲修嚴曠典則東鄉之尊謂宜先定  
夫宗廟事體至大至重有輒擅議罪萬死然私竊懷

此久矣幸遇陛下隆寬逮下不間疏賤茲敢冒昧一  
言倘或可採乞從睿斷舉而行之天下幸甚臣謹按  
太廟九室之制始於唐之明皇非本於禮也而後之  
爲說者乃遷就其事以爲三昭三穆與太祖祖功宗  
德三廟不遷爲九廟蔡京之議祖襲唐制漢以高皇  
帝爲太祖尊居東鄉後世無有異論魏以武帝爲太  
祖晉以宣帝爲太祖蓋皆以始封爲據唐以景帝始  
封故尊爲太祖其後追崇獻祖而列景帝於昭穆禮  
官陳京抗論辨證前後二十年卒復其舊識者是之  
蓋以景帝始封於唐事蹟有類乎后稷要之非始封



之君受命之祖不得居東鄉由三代歷漢魏以迄於唐無異道也我太祖皇帝開基雖與后稷異而創業實同乎高帝未聞漢以太公合食於禘而居高帝之上也今若正太祖東鄉之尊稽古沿革委合禮經臣再考商周之興太廟世遠而羣廟之主皆出其後故其禮易明漢魏而下太祖世近毀廟之主皆在太祖上於是禘祫不得如古制而漢魏之制太祖而上毀廟之主皆不合食唐以景帝始封故其後廟制既定始以獻懿而上毀廟之主藏於興聖德明之廟遇祫卽廟而享焉是以別廟之祭以全太祖之尊當時剛

勁如顏真卿儒宗如韓愈所議雖各有依據皆不得

易陳京之說以其當理故也歷代沿革具在謂宜博

采而擇取其當

要錄九十二

九月試太常少卿十月改尚

書右司員外郎旋以左朝請郎守起居舍人劾罷權

知賀州直徽猷閣程芾六年六月試中書舍人王淵

增置閣門官員外缺蔡言其非遂寢前旨又奏陛下

雖當巡守必載廟主然近歲時享徒以有請弗殺牛

者至三牲不備而謂之隨宜今陵寢尚渝偽境歲時

衣冠之游未獲嚴奉獨有太廟神主祀事必過於厚

情文始稱禮也詔禮官舉行以稱詆事神靈之意從

之

卷一百一十五

李健在任爲劉光世參議官金人入犯二

人自廬遁歸蔡奏言應坐軍法乃降一官

卷一百零六

旋

兼權禮部侍郎先是有旨禁伊川學錄黃行下吏部

郎官黃次山欲鑿版蔡請少俟而以己意進對禮部

欲遍牒所屬蔡又難之戒諭堂吏毋得輒發御史臺

謂蔡沮格詔令七年正月遂罷爲集英殿修撰知衢

州旋請祠提舉江州太平觀尋起徵猷閣待制知嚴

州九年罷爲提舉台州崇道觀寄居宜興二十二年

右諫議大夫章履論蔡干撓縣道落職二十六年起

爲左中大夫知婺州

卷一百一十七

七十二年罷爲提舉洪

州玉龍觀引年告老詔復敷文閣待制

卷一百九十八著有

廣川家學二十卷燕談三卷

直齋書錄解題

黃次山字季岑庭堅族子宣和元年試國學第一以  
庭堅名在禁錮復抑置第四歷信陽州學教授池州  
司理參軍靖康初遷博士坐與李綱厚善謫監虢州  
銅場建炎二年擢尚書員外郎未幾撫御京東西路  
使還乞外補遂知筠州又乞監當以歸丁內艱終喪  
復吏部郎官入對力陳日食之咎又進校旗大閱之  
法會金兵大至淮南告捷次山言策功行賞勸沮所  
係因條上三策乞解六將軍逗留者之節鉞授偏裨

立功者朝廷既罷劉光世兵柄命呂祉代之次山言  
光世固可罷祉雖若可用然統師御眾非其所長其  
言卒驗靖康以來學者宗程顥兄弟不能深明其旨  
轉爲迂怪紹興初諫官極論其弊有旨戒飭學者次  
山時權禮部郎官與侍郎董棻爭之於朝事雖直而  
謗議起矣出提點荆湖南路刑獄居數月以言罷主

管亳州明道宮凡九年卒

危太朴集

王昇字逸老本京師人草聖奇偉徽宗朝被召入御  
書補右爵高宗南渡寓居崇德之羔羊時上留神翰  
墨近臣有言其能者召對賜札以書玉音褒賞官至

正使

至元嘉興府志

任申先字世初四川眉山人父伯雨宋史有傳靖康初李綱薦自布衣錫對欽宗忽問云卿在前朝曾上書乞取燕雲申先云誠有之臣是時爲見遼國衰弱謂我若訓練甲兵遲以歲月乘此機會可以盡復燕雲舊地初非欲結小羌擣其巢穴此書尚在可賜睿覽上云曾見之使如卿言燕雲之地何患不得繼以歎息卽批出賜進士出身自是進用

揮塵餘話

康與之字伯可洛陽人居宛邱祖識元豐八年東上

閩門使嘉州刺史賞西夏功頒榮州團練使

長編三百五十二

二父倬字爲章爲右班殿直折節讀書

揮塵錄

紹興元

年知臨江軍李成黨邵友犯臨江倬遁

宋史

晁以道居

嵩山與之常往學焉又從澗上文人陽翟陳恬遊熟

記左氏不遺一字與常子正同鄰居同極愛之南渡

初高宗駐維揚上中興十策名頗噪旋監杭州大和

樓酒庫坐盜錢飾翠羽爲妓金盼履免官八年謁常

同於湖州以養母爲請同創一檢察御書之員月關

緡錢三萬俾奉其母與之乃不以爲養同採取數月

逕致其母與之鞅鞅去旋因左璫以題徽宗畫扇詩

愛知高宗起爲承務郎紹興十五年上以星變求言

與之上書言彗不足畏秦檜大喜轉改京秩監尙書  
六部門專應制爲歌詞諛體十七年擢軍器監丞十  
九年冬東平周三畏彥恭知蘇州與之挾秦氏子弟  
勢爲樂妓趙芷脫藉攜以去三畏不敢顯拒謀之通  
判蘇師德師德同亞壻也其子玘又爲同壻皆愛其  
才恐爲與之終身累乃追還芷與之恨甚二十年二  
月同卒于海鹽遂訐三畏賻錢二百萬令師德越境  
往祭祭文有奸人在位公棄而死亡之語檜怒命提舉  
王珪鞠之三畏鑄職師德編管玘亦停官與之竟娶  
芷爲儷云未幾又稱秦檜命往鎮江市玉帶又從都



統王勝借金上聞出之外爲福建安撫司主管機宜  
文字檜死監察御史湯鵬舉劾其在平江干求州縣

妄造語言貪污尤甚二十五年除名編管欽州二十

八年坐與土人交爭移雷州要錄一尋移送新州牢

城弟舉之譽之皆進士二十九年臨安奏其妄說事

端送南康府聽讀本軍拘管百八十九與之善爲詞曲世

比柳耆卿著有順庵樂府周南仲山房集鶴林玉露

程史繫年要錄汪文定集

鄭厚字景章福建莆田人四歲聞讀書能默記七八

歲通解經旨作詩文皆出人意表舍法行士子惟通

一經厚獨兼之舉進士入太學以親老委之而歸講學薊林四方從遊者日眾與從弟樵倡物理之學宇文虛中一見嗟異嘗遺厚書曰士弊於科舉久矣安知亦有淵源深渺不爲俗學所漬如二君者乎紹興五年再試禮部奏賦第一登進士廷對六千言指陳無隱初考官第厚居下高宗素聞厚名詔特循兩資與陞擢差遣授左從事郎調泉州觀察推官未赴上封條奏三事一曰國勢謂建立舊鎮使犬牙相制也二曰治體謂調兵足賦使攻守有備也三曰兵略謂犄角敵騎以控其奔衝也參知政事劉大中力薦厚

材左僕射趙鼎亦以爲言得旨召對厚復上御相固本攬權之策高宗嘉納會秦檜擅權大中鼎相繼去國詔任滿日改合入官厚至泉鼎適來知泉州事無巨細悉以屬厚踰年除廣南東路茶鹽司幹辦公事言者希檜旨論厚詔事趙鼎謗議朝政遂罷歸初厚少時嘗著藝圖折衷論多過激旣而悔之有竊其稿以刊者遂布於外駕部員外郎王恭摛書中詆孟子語言於朝詔厚自今不得差充試官及堂除令建州毀板其已傳者皆焚之厚家居十年不得調檜死起昭信軍節度推官值齊述之亂厚脫身賊中出與守

將協力討平之復請於帥守發帑掩骼埋骸賑給流  
離郡賴以安改左承事郎知潭州湘鄉縣卒於官年  
六十有一厚器識閱遠學問淵博文以左氏爲法詞  
賦典麗秀傑爲時所宗參政龔茂良嘗謂莆中文士  
以湘鄉爲開山祖云

建炎以來繫年要錄  
參興化志入閩通志

王銍字性之汝陰人昭素之後曾紆壻也父萃字樂  
道銍嘗從歐陽修學南渡後寓居剡中善屬文不樂  
仕進讀書五行俱下他人纔三四行銍已盡一紙記  
問該洽尤長國朝故事對客指畫誦說數百十言退  
面質之無一語謬

老學庵  
筆記

紹興初累官右承事郎守

太府丞迪功郎權樞密院編修官纂集祖宗兵制書  
成四年三月賜名樞庭備檢罷爲主管台州崇道觀  
銓以建隆元符信史屢更書多重複乃以七朝國史  
帝記志傳外益以宰執宗室世表爲宗室公卿百官  
年表常同爲中執法言于朝詔銓祠中視史官之秩  
尙方給劄奏御至九年以元祐八年補錄及七朝史  
上之詔進右宣議郎然所修未及半後爲秦檜所阻  
不克成要錄一百二十五九年二月秦檜上徽宗陵名永固  
銓言後周叱奴皇后陵實以爲名當避檜大怒進右  
宣教郎充湖南安撫使參議官獻祖宗八朝聖學通

紀論遷右宣教郎

一百五十一

十三年獻大元經解義賜

白金三百兩

一百四十九

藏書數百篋無所不備銓卒秦

燔手書移郡將欲取其藏書且許以官其子廉清字仲信號泣拒之曰願守書以死不願官也郡將以禍福誘脅之皆不聽燔亦不能奪廉清著有京都歲時記廣古今同姓名錄

老學庵筆記

次子明清字仲言紹熙

乙酉簽書監國軍節度判官

玉照新志

著有揮塵三餘玉

照新志投轄錄

畢良史字少董自號死齋上蔡人文簡公士安五世

孫解第進士少喜字學得晉人筆法壯遊京師以買

賣古器書畫之屬出入貴人之門當時謂之畢債賣  
靖康之變僑寓與國軍蔣璨官江西喜其辨慧給貲  
令赴行在諸內侍皆喜之高宗方搜訪古器書畫之  
屬恨未有辨其真偽者得良史甚悅月給俸五十千  
仍令內侍延請爲賓客又得東脩百餘千會迪功郎  
權婺州司戶參軍畢隣者死事得任子恩其妻言子  
爲金人所殺願官姪良史遂補上州文學繫年要錄  
北盟會編六 紹興八年金人歸三京地擢右迪功郎  
研齋二筆 開封府推官乃益搜求京城亂後遺棄古器書畫買  
而藏之金人敗盟開封陷良史入千金不仕乃教學

講春秋有從之游者因爲圖名繙經寫其訪問紬繹

之狀

解題

十二年和議成與孟庾李正名同放還遂盡

載所收骨董至行在上大喜良史上言不能死節請

正典刑詔放罪旋差監南嶽廟

一百四十五

十三年正月

進春秋正辭特改右宣議郎幹辦行在樞密院十五

年七月加直秘閣知盱眙軍

一百五十四

十八年進直敷

文閣二十年八月卒于任

一百六十一

著有春秋正辭二

十卷繙經堂集八卷

解題

周紫芝字少隱號竹坡宣城人家貧苦學得詩法于

張文潛李端叔清麗典雅在山谷後山派中爲小宗



建炎初貢京師應詔上書言今金人盛強憑侮中國雖天下之兵以養之不足以當其強竭天下之財以餌之不足以厭其欲盡天下甘言以悅之不足以回其意臣深愿之不過一言曰上策莫如自治而已自治之策無他在力救前日之弊耳陛下亦嘗思所以致今日之禍者乎用人不專黜陟不明剛斷不足此三者所以召禍亂之本也李剛危言謏論天下登聞朝廷知其爲賢既委以輔相豈當責以將帥之事遂致覆師以貽竄逐綱之用舍係一時之輕重願陛下盡以國計傾心付之勿惑於詆訾不根之言毋責

以勝負不常之勢臣所望陛下專於用人以救前日之弊者此也六賊之惡暴著遠邇當時猶且遷延歲月處以善地元惡有如蔡京猶得保其腰領而死其同惡之臣非特不能盡去方且依以爲用或付以兵柄或委以重寶凡今日奔軍之將亡國之大夫皆前日姦佞闖禍可誅而不誅可去而不去者如此人尙在要路則幾何而不致於喪師割地誤國欺君者哉臣願陛下大明黜陟以正忠邪屏除畏懦軟弱之徒旌耀骨鯁難犯之士使天下曉然皆知忠義者必賞姦邪者必誅則忠臣爭效死節壯士勇於敢爲庶幾

可以雪恥臣所望陛下大匠懸鈞以救前日之弊者  
此也淵聖皇帝虛以受諫常若不及惜其羣言交至  
一切聽納受之泛然無所甄別而人主之權遂歸臺  
諫敵圍初解議者欲追擣之既而惑於羣言不能斷  
以必往而割地之盟棄不復用明年敵騎果入而惑  
於眾議守城不遷至有今日之禍臣所望陛下勇於  
聽斷以救前日之弊者此也夫任用之專最爲人主  
難事今旣得賢而用之不能去姦邪則其勢必不兩  
立此三者陛下勉之而已紹興十二年始以廷對  
第三釋褐十五年五月設六部架閣官紫芝以迪功

郎掌禮兵兩部十七年十二月以承奉郎爲樞密院編修官旋進右宣教郎兼實錄院編修官嘗和御製詩已通灌玉親祠事更有何人敢造猷秦檜怒其諷已二十一年閏四月知軍國軍政崇簡靜終日焚香課詩而事不廢秩滿乞祠寓居九江之廬山以終要錄參江西江南通志著有竹彼詩話一卷太倉稊米集七十卷傳于世

宋史翼卷二十七終

男樹謹校字

宋史翼

卷二十七

三十六